

855.4  
**HOMILIA**

SANCTISS. DOMINI NOSTRI

**CLEMENTIS XI.**

**PONT. MAX.**

*HABITA*

IN DIE NATALI CHRISTI DOMINI

**Inter Missarum Solemnia**

IN BASILICA PRINCIPIS APOSTOLORUM

*ANNO MDCCII.*



FLORENTIÆ, MDCCII.  
TYPIS REGIÆ CELSITUDINIS  
Apud Petrum Antonium Brigonci.



---

*Superiorum Permisu.*



THE UNIVERSITY OF CHICAGO  
LIBRARY  
1100 EAST 58TH STREET  
CHICAGO, ILL. 60637



OX præcessit, Dies  
appropinquavit:  
dies redemption-  
nis novæ, repa-  
rationis antiquæ,  
felicitatis æter-  
næ; in quo scili-  
cet fecit Domi-  
nus novum su-  
per terram; no-

stræque memor infirmitatis, de summâ  
paternæ claritatis altitudine descendens,  
terrena visitare non est dedignatus, &  
amissam mortalibus lucem fulgidâ adven-  
tus sui coruscatione restituit. Venit de-  
sideratus cunctis gentibus, à Libano ve-  
nit, à regalibus sedibus venit: aperta est  
terra, & germinavit Salvatorem. Omnis  
jam veteris prævaricationis solutus est  
metus, quem dæmonis dudum fraudibus  
circumventa incurrerat humana fragili-  
tas. Redit in honorem suum ab antiquis  
contagiis purgata natura, redit in inno-  
centiam iniquitas, in novitatem vetustas;  
Deos quippe facturus, qui homines erant,

homo factus est , qui Deus erat : nec amittens quod erat , fieri voluit ipse quod fecerat . Fecerat Deus hominem in exordio temporis ad imaginem , & similitudinem suam : factus est Deus homo in plenitudine temporis ad imaginem , & similitudinem nostram . Primus homo de Terrâ terrenus , secundus homo de Cœlo cœlestis . Ille præcepta Dei negligens , peccati induxit damnationem : hic factus sub lege reddidit iustitiæ libertatem . Ille , cùm esset homo , Deus esse voluit , ut periret : hic , cùm esset Deus , homo esse voluit , ut , quod perierat , vivificaret . Ita sanè , qui ante tempora erat unicus Patri , unicus in tempore natus est Matri . Immortalis cum Patre , mortalis ex Matre . De Patre principium vitæ , de Matre finis mortis . Post Matrem de Matre factus , ante Matrem de Patre non factus : sine quo Pater nunquam fuit , sine quo Mater nunquam fuisset . Mirabilis quidem potentia , sed planè mirabilior misericordia , quod Ille , qui sic nasci potuit , sic na-

nasci voluerit. Voluit sic nasci Deus ,  
Venerabiles Fratres , Dilecti Filii , anti-  
quæ superbiae vulnera insuetæ humilita-  
tis remediò curaturus : eo proinde tem-  
pore inter homines adscribendus , quo  
gentium Imperatrix Roma humani ge-  
neris capita singula , ad superbam im-  
perii gloriam , iusserat recenserì. Vir-  
gineo pendentem ex ubere natum Do-  
minum primi omnium pauperes gregum  
custodes , monentibus Angelis , invene-  
re ; ea nimirum , quæ à sapientibus , &  
prudentibus absconderat Altissimus , par-  
vulis revelavit , voluitque nativitatis suæ  
testes esse Pastores , qui Discipulos exce-  
pturus erat Piscatores. Cœlestem infan-  
tem vilibus involutum pannis , gelidâ  
nocte hyberna frigora geminante , agre-  
stes paleæ , aspera gramina circumdant.  
Divinam Genitricem , cui locus in di-  
versorio non fuerat , antrum excipit  
suburbanum. Inops mater , inops filius,  
inops tugurium. Mater in sœno, Filius  
in præsepio. Hoc elegit Mundi Fabri-  
cator hospitium : has habuit delicias  
sa-

sacræ Virginis puerperium. O inanem  
hominum fastum nascentis inter mor-  
tales Dei humilitate depressum! O fal-  
laces divitias Christi paupertate damna-  
tas! O fluxas Mundi voluptates Re-  
demptoris nostri cunabulis subverfas!  
Addiscamus, Dilectissimi, nova hæc  
erudientis nos sapientiæ documenta à  
nondum loquente Magistro. Falsò Chri-  
stiani dicimur, si Christi imitatores non  
sumus. Attendamus ad petram, unde  
excisi fuimus, & ad cavernam laci,  
de qua præcisi fuimus; Amemus Filii,  
quæ Patër amavit; Sequamur Servi  
viam, quam secutus est Dominus.  
Diximus nuper cum Apostolo: Primus  
homo de Terrâ terrenus, secundus  
homo de Cælo cœlestis: Addimus  
nunc cum eodem Apostolo: Sicut por-  
tavimus imaginem terreni, portemus  
& imaginem cœlestis. Abiiciamus ope-  
ra tenebrarum, quas filius Dei venit  
dissolvere: induamur arma lucis, quam  
oriens æternus Sol de Cælo portavit;  
ut ita regenerationis nostræ responden-  
tes

tes dignitati, ac, sicut in die, honestè  
ambulantes , auxiliante Domino , &  
perducente nos ad promissiones suas ,  
Salvatorem Mundi , quem hodie in  
nostrâ carne nascentem adoramus in  
Terris , perpetuò in sua majestate re-  
gnantem videre mereamur in Cœlis.

